

四庫全書

集部

欽定四庫全書

集部

元文類卷四十八

詳校官通政使_臣夢吉

助教_臣常循覆勘

總校官庶吉士_臣朱鈐

校對官中書_臣嵇承志

謄錄監生_臣陳瞻燧

欽定四庫全書

元文類卷四十八

元 蘇天爵 編

祝文

江南平告太廟祝文

王 磐

踐祚守文雖奉已成之業繼志述事敢忘未集之勲眷
靖康亡滅之餘擅吳會膏腴之壤依憑江險壅隔皇風
累興問罪之師猶守執迷之意逮戈船飛渡列戍土崩
始悟前非方圖改過遂稱臣而奉表願納地以歸朝宋

王鼎已于杲日月來至闕下其江南郡縣人民已委官撫治了當朔雪災風盡書軌混同之地商孫夏裔皆蒸嘗助祭之臣顧冲眇以何功實祖宗之餘蔭尚祈昭監永錫休嘉

太廟火災告祭祝文

閻復

惟大德六年歲次壬寅六月癸亥朔十二日甲戌孝曾孫嗣天子臣某謹遣攝太尉中書左丞相臣哈喇哈遜達爾罕敢昭告于太祖聖武皇帝于穆清廟對越在天

便殿火災震驚神御聿懷懼省祇薦苾芬祖考以寧來
格來享

得玉璽奏告太廟祝文

王 構

維傳國之守器為歷代之珍符得自神臯進由憲長詢
以僉言則脗合考之圖制則無差皆祖宗孚佑而致然
亦祚膺隆昌之所繫是烝是享孔惠孔時以介壽祺以

流曾慶

右第
一室

昔黃龍薦瑞有虞肇基玄扈授圖周成襲祚誕膺景命

夫豈無徵方祔嗣于徽音遽親承于鎮寶臺臣貢上良
用惕然殆天相皇元啓萬世無疆之業抑如大琮玄璧
為宗闡世守之珍靈貺之來盍知所自尚祈叶兆既壽

永昌

右第
二室

闕宮儲祉德著神儀瑞玉來歸孝孫有慶矧在嗣徽之
始進由耳目之官上以表信于神祇下以系隆于後嗣

爰脩報典思媚大姜俾熾而昌長膺戩穀

右第
三室

猗維瑞望顯伏靡常麟質鳳章萬世所寶式當今日啓

祐皇圖穀旦于差告蠲致享以燕翼子於萬斯年

右第四室

加謚祖宗告祀南郊祝文

姚燧

維至大二年蒼龍巳酉冬十月庚戌朔十有九日戊辰
嗣皇帝臣某臣賴上天之祐祖宗之靈得以眇末之躬
託于億兆京垓臣民之上持盈守成凡今三年身至太
廟兩嘗裸將非獨于親立愛臣家庶亦孝治可先天下
而祠官讀祝于太祖室惟曰聖武皇帝睿宗室亦惟曰
景襄皇帝至世祖室則曰聖德神功文武皇帝名譽之

美垂無窮者多及六言顧于創業之祖垂統之宗開我
後人繼繼承承億萬維年者稱述成功盛德有所未盡
心實歆然謹遣太尉尚書右丞相臣某禋致牲玉燔柴
泰壇昭告昊天上帝加謚太祖曰法天啓運聖武皇帝
睿宗曰仁聖景襄皇帝伏惟圓靈居高聽卑灼臣微忱
勅我祖宗歆此嘉誅臣不勝感激戰慄之至

己卯春釋菜先聖文

劉因

聖代天言明告萬世寥寥方冊孰傳聖言天啓聖心程

朱將命堙晦浚闢聾聵瞽明謂當後人承此遺澤孰云
剽盜資我而文肆焉多岐孰會其一徒為瞻仰有惻此
心因早躁狂若將有志中實脆屈未立已頽揆厥無成
實由貪懦時馳意去凜不自容顧念初心怍焉如失今
此闢館惟我之求講學有徒進脩有地研窮參訂亦復
有書于古遺言于今學者尚有裨益少慰此心但懼悠
悠復循前軌惟神啓迪實有臨之

告峨山龍湫文

劉因

嗚呼一邦之望有峨惟山山之精深聚而淵泉山川惟形有神棲之雲雷雨露神實司之今是邦之凶旱極矣豈神之靈坐視而不恤哉豈雨暘之數出于天非神之所得專也雨暘之咎由于人非神之所得而釋也是以使神函蓄靈潤雖欲發之而不得也雖然山川之神受命于天而主祐下民者也今欲祐之而不得矣則當為之請命于天昭昭在上安有不從由是言之神雖欲無責烏得而無責也且小民至愚窮且極矣而無所歸誠

則惟淫昏之鬼是求夫淫昏之鬼乃神之所當屏黜而
下民之衷亦神之所當誘相也今氣運已窮矣窮則必
通或天降之雨則小民必歸功于淫昏之鬼而惑信愈
篤孰能禁之今是邦之大夫致禱于神則是禱其所當
禱矣既禱其所當禱而當禱之神能隨其禱而應之以
雨使既足而又周浹焉庶小民之愚知天地之間自有
名山大川之正神實能闔闢陰陽而神妙造化而境內
吏民之所當敬脩其壇壝潔其牲幣而事之而向之所

謂淫昏之鬼者真不足信矣如是則人情世教或自此而變之則鬼神之患又不但一雨而已矣如其不然則是雲雷之澤神其不可尸之旱乾之虐神實不能恤之天命之職可怠而曠之惑邪之俗可助而成之又何望焉又何望焉敢告

封龍書院釋菜先聖文

安熙

維大德十年歲次丙午秋七月己巳朔越翼日庚午後學安熙敢昭告于先聖至聖文宣王熙愚極陋總角趨

庭私淑諸人實始聞道自茲厥德欽誦遺編近本程朱
上窺思孟以求經旨以探聖心庶竭駑頑進德脩業孰
云不力中道而迷悲歎窮廬摧頽已甚雖由病廢實亦
惰偷內自省循枯落是懼茲焉感憤避俗巖居追憶舊
聞卒究前業洒掃應對謹行信言餘力學文窮理盡性
循循有序發軔聖途以存諸心以行諸已以及于物以
化于鄉或冀有成不悖于道茲涓吉日載見祠庭旨酒
蘋蘩式陳明薦尚靳啓迪實誘其衷庶假威靈不至大

戾謹率諸生恭脩釋菜之禮用伸虔告

祭文

祭海神文

虞集

潮失故道犯我鹽官有司得防民力旣殫閱歷歲時靡
濟茲害浙郡多下恐就淪敗民實何辜不德在予相臣
來言交脩用孚乃勅中外悉智展力相爾有神亦克受
職我土旣固民生底安六府治脩報祀萬年

祭伍子胥文

虞集

爾以忠隕主潮于吳潮今為災吳其沼乎爾其揚靈具
訓海若俾安其常毋作民虐既止既安民遂有生爾作
明神永有令名

祭國信使王宣撫文

楊 奐

維歲次癸卯四月丁未朔二十有一日丁卯某官某謹
具清酌庶羞之奠致祭于故宣撫御史大夫國信使王
公之靈嗚呼兩軍之間零丁數騎江湖十年風霜萬里
不知其幾往幾來而卒至于此乎人主察其深誠天下

仰其大義鬼神錄其陰功簡策炳其高議然事之濟與否也非智力之不周或期運之未至不然以公之行不能決和事于一言載信書于萬世而使干戈相尋膏血塗地猶執迷而不已我公初年委身烈祖千載一時雲龍風虎蔡城旣下楚茅不來殺氣盤礴吞江噬淮義膽披露上心亦回使星南飛迓車擁路歡動牛斗歎其來暮應對款曲不武不怒殷監弗遠請視全夏剖析利害略無假借我不彼欺彼不我詐宴勞稠疊朝繼以夜歸

奏龍廷君相交俞慮後忝差或懷異圖公為國計人為
公憂蛟鱷之淵而堪再投公獨坦然汝無我尤我君我
相寧不我謀丁酉之冬公過陽平贈我雄篇出言甚誠
兩國好合賴子以成子才子名搖動江城適有家累莫
顧其行公實我知我自不能此所以含辛茹酸愧負于
冥冥也嗚呼哀哉頃聞使車淹留沔陽忽報江陵坐易
星霜宵夢飛飛不知在床玉溪東館金碧熒煌恍然門
開棘園堵牆太山既裂始知不祥幾年金節炤耀南荒

一日漆棺歸來朔方將大限之難逃抑生靈之禍未央
顧公之室豈無橐裝千金一揮廩無見糧賓客蕭條路
人慘傷嗚呼哀哉我生後公仕及同時人之于公其孰
不知我之知公獨與世而背馳陸公何人屈趙佗而朝
漢闕終軍孺子攜長纓而羈南越無以成敗輒生予奪
公之清衷遐略高名大節可以撼天壤摩日月而素志
未酬徒賡恨于九原此余所以撫地大慟繼之以血也
嗚呼哀哉尚饗

祭太保劉公文

徐世隆

維至元十一年歲次甲戌冬十二月望日博州路總管
徐世隆謹以清酌庶羞之奠致祭于太保劉公之靈嗚
呼天興大元六十餘年王氣所鍾有開必先聖不獨出
衆賢從之聖賢相逢千載一時巖巖劉公首出襄國學
際天人道冠儒釋初冠章甫潛心孔氏又學葆真復叅
靈濟其巖無盡其境無涯鑿開三室混為一家逆知天
命早識龍顏情好日密話必夜闌如魚得水如虎在山

易地諸葛彌天道安道人其形宰相其心誰其似之黑
衣惠琳數精皇極禍福能決誰其似之邵君康節詩詠
高逸方外神遊誰其似之碧雲湯休字畫清勁筆中法
具誰其似之黃山文孺扈從王師柔服哀牢公于是時
蜀之常臯堂上出奇鄂江飛渡公于是時晉之杜預天
王旣尊山人自晦公于是時唐之李泌相宅卜宮兩都
並雄公于是時周之召公中統建元宣撫十道多舉名
儒親草其詔至元入省命贊萬機暫決大議力辭以歸

上亦知公不屑細務止解中書仍居保傅官制未定公
圖列之朝儀未肅公奏閱之方其弘化儀型萬方天遽
奪之今也則亡生平少疾質明猶唱開戶視之掩書長
往天子震悼朝臣涕洟下至行路靡不哀思國事有疑
誰與稽之民歲有災誰與禳之僚友有咎誰與救之人
之老成寧復見之曩過趙郡識二大士曰蕭曰劉器量
包世混迹佛老心同孔周仁雨義風欲灑九州蕭已先
蛻獨餘歲春栽培桃李徧滿君門身為師賓門多卿相

生被殊遇歿獲大葬公既無憾我獨何悲第愧老繆嘗
辱公知愛我文辭許我典故視草翰林持衡文部公非
私舉我豈懷恩言念知舊往哭其墳南州孺子生芻一
束奠章寫心老淚盈掬嗚呼哀哉尚饗

祭硯司業先生文

滕安上

至元己丑十有二月某日門生國子博士滕安上謹遣
子羽以清酌庶羞之奠致祭于司業先生硯公之靈士
之文章與世汙隆百年以來南北不同惟公述作有稽

其中學者師之知所適從士之志操與齒盛衰一生之間終始自違惟公抱負白首不移學者仰之得其表儀於戲教授東垣淵淵乎經義之學司業成均表表乎忠孝之教具起之暮也固非淺淺之可議具去之果也又非庸庸之可効公之歸老猶振頽波遽云逝矣為之奈何八十雖壽在公匪多聞公易簣了然不亂平生之守于此益見自公之歸夢寐見之況于永訣無復見期一官羈人送不及尸千里致真寓哀一詞

祭魯齋先生文

呂端善

公之道在天地德在人心行義在朝廷功業在後世者
章章表表如日之在天如泉之在地為門生者不當以
是瀆陳之惟其私心之不能自己者敢以告之公之生
以扶人極振人綱為心沒而不應肯忘也今人極其立
乎人綱其明乎下土茫茫豈無才良間有作者敢希厥
成言語不遁趨詣不同聞望不崇誠孚不隆猷之雖遠
群呼四訏謂角而童謂雌厥雄使公而在猷難厥終公

而已矣疇能奏功維蒙古生疑然古風稔公之教在耳
蘊公之化于躬雖所賦有厚薄所得有纖穠惟公擇其
尤者相之導之以陰誘其衷使之默識心通視明聽聰
謀嘉慮忠言行諫從則可以鞏國家無疆之祚惟寧永
生民無疆之休惟洪則我後人于子于孫亦叨居于至
化之中生也望于公沒也又望于公予以見生民之心
之望于公者無窮也

魯齋先生陞從祀祭文

許約

維皇慶二年六月十四日癸酉欽承綸旨以先師文正公魯齋先王列于大成至聖文宣王從祀之位門人許約等謹以清酌庶羞之奠合辭而祭之曰自太極判而人文開包羲作而畫卦始備物以致天下之用成器以爲天下之利益肇乎乾坤者惟一理盈乎宇宙者惟一氣人倫由是而明萬事以之而理王之所以王帝之所以帝百世同符有一無二迄于周衰篤生聖人有德無位遭時之屯周流天下而不我用乃獨任乎斯文明王

道于已晦振綱常而再新顏曾再傳而得子思至孟子
獨不迷其津泯泯焚焚歷歲時之既久承承繼繼乃寥
廓而無聞迨乎有宋實生周子畫無極之大原為萬物
之根底扶泰山已摧之巔發千古不傳之秘淵淵河洛
大暢斯旨天理之微人事之著鬼神之幽至于子朱子
而大備天眷皇元我文正公實有得于此也合衆議而
有歸惟前賢之是證既縷析而毫分亦提綱而振領盡
小學之精微為後人之龜鏡言仁義必本諸身言道德

必由乎性動靜必循乎禮終始不忘乎敬春風藹然物
我融會冰壺瑩然表裏輝映出而佐時也必欲底雍熙
之和進而事君也必欲止唐虞之聖事必探乎幾先俟
其久而乃應言治亂之所生盡天人之交勝其高也入
于無倫其近也不離于日用叙天工而振王綱正人心
而祈永命觀其運用天理而見諸行事者欲名言而奚
罄耶蓋嘗思之以百年凝道德之身千載繼絕學之志
由布衣而起田野總庶官而宅百揆明歷象以授人時

創辟雍而教胄子忠言疊疊氣不少衰為學孜孜老而後已蓋其所造者深所積者廣舉而措之事業者獨高乎一世非義精而仁熟道全而德備者疇克爾耶宜乎聖天子念之不忘崇以魏國之封褒以文正之謚又欲嘉惠後人也乃命列于從祀之位既相其子又撫其孫猶諄諄而不置也况約等親出其門提耳之言面命之誨天地純全古人大體朝焉夕焉誘掖諄至容聲謦欬不遠伊邇嗚呼昊天罔極之恩仰而思俯而戚曷其有

既耶

祭康先生文

王思廉

翰林學士承旨致仕王思廉致祭于故國子博士康先生之靈而言曰吳楚奇材梗楠豫章下蔽牛馬上摩穹蒼脩直堅緻可棟可梁斧以斯之不得締構乎明堂渥注異種緣耳飛黃過都歷塊電掣龍驤以駕大輅和鸞鏘鏘困于鹽車弗獲馳騁乎遐方先生之學經笥書囊先生之才錦心綉腸視草北門制禮奉常外而藩宣內

而贊襄何施匪宜皆其所長進用無媒竟老國庠猶木
之不過于匠石驥之不過于孫陽噫噫孰維孰綱孰主
孰張吾欲問之神理茫茫耆英已矣識者歎傷雖然有
德以化其鄉有文以流其芳愈遠愈思愈久愈光是之
謂不亡

祭徐承旨文

李之紹

維大德五年春二月辛卯中書平章政事賽音迪延齊等
謹致祭於故翰林學士承旨徐公之靈嗚呼古人有言人

材實難撫治論賢遺世永歎才與時夸識局于器文勝
自敷授事則躋偉哉通儒慨惟容翁蚤奮其辭乘時之
隆肆其餘長見于治功出入中外曰亦有歲素髮滿幘
歸掌帝制渾渾周誥我庶見之謬謬廷議我庶選之朝
有老成衆與有慶孰云其去有不惆悵君子之心夙夜
本朝忍失去之以遠為超劃爾歸盡嘖嘖稱遽身有遺
用永蓄弗著千里寓哀匪哭其私國之遺老我寧不思

祭袁學士文

虞集

昔在故國寓都海邦乃睠鄞越視漢河陽王公近臣專
邑列府卿士以還民莫或數公生其間不靡不矜師友
是求問學是承先宋旣亡文獻淪墜遺老或慙力接淵
懿家藏多書俾昔石渠下至琴奕亦最其腴博學洽聞
瑰偉精瑩人無間言公亦自信我從草茅或援起之公
以賞延後先京師于時同朝多士濟濟公獨我友尚論
其世制作討論必我與聞或辨或同有定無諠公泰而
舒我蹇蹇跋三十餘年亦多契濶公在禁林益躋華階

人曰孔宜公曰足哉歸而寄書勗我慰我亦喜優游自
詫其果曰易春秋曾與子談將卒成書恐老弗堪老不
廢學唯予與爾終訂無忘庶其在予言猶在耳俄以計
來噫天生公乃止斯哉儒林木萎壁府星隕伊邦之瘁
伊道之閔區區深悲遠莫致之託公鄉人致茲哀辭公
聞之乎不聞之乎

哀辭

平章政事庶公哀辭

李元禮

嗚呼哀哉識公于生之日哀公于死之後者人情也哀
公于死之日昧公于生之前者人情乎嗚呼識而哀一
人之私哀也哀而不識天下之公哀也方公之在相位
也朝廷倚之以為重四夷賴之以為安萬民化之以為
治陰陽調和而品物無不遂矣及公以病去位也天下
皇皇祝公無恙豈期沈疴反復而竟不起矣嗚呼哀哉
蒼天蒼天果蒼蒼耶胡為遽奪公以亡耶伯夷之清伊
尹之任魏徵之良耶具忠魂正氣散在天壤間幾世幾

年復為賢相耶不然將升而為星辰峙而為山嶽流而為海為江耶嗚呼作善降祥不善降殃何此理之反常而不可明耶故余誅公以辭者蓋非一己之私傷亦以公天下之哀而哀萬民之失所望也

林處士哀辭

袁 桷

道家言黜聰明去健羨形神始完是果為得道耶古者上壽百二十歲竊不死之說者曰脩之益真其道彌親壽而無德與名君子恥之故脩短有命遺壽焉猶可言

也名德不至則漸盡腐滅又安所取哉古之人若是者
衆矣今得一人焉曰林寬字彥粟形臞而器溫其于學
也汲汲然逐日以補有不足焉則力探簡策以自證其
為文必達于理而始精于詞謂詞者載理之具也理不
足焉詞雖精無益者深思以求之傍取傳記之說勦絕
傳會據宗統原以會于一復懼其未盡是也則祕重自
念將周游四方闕疑廣聞目擊而心領焉噫若可謂勤
已矣道散于九流百家彌綸者至矣其弊有不勝言者

汎濫俚雜尸坐瞠目漸入于無聞之傳予嘗察彥栗知其心有深憂者焉余始見于姑蘇氣和以謙再見于京師愀然以思取士之道非一嚴畛域析毫髮有司者之過遺逸不舉則凡我徒在官者誠有罪彥栗志不在是推彥栗之志在問學為之而不果就若是者真有命矣悲夫延祐六年三月卒于京師年三十有九其弟字友謹哭且曰吾必奉喪歸吳興吳興吾先人所藏遂為詞以申其哀焉辭曰

氣清明兮受元陽德
彌中兮閭以章
挈太古兮儼九皇
播挈精兮瓊圃芳
力未具兮志則專
一蒂渺兮濟巨川
慨不進兮道遠邇
白晝速兮陰風旋
數實紀兮吾何愆
路孔脩兮神獨還
靈旒遷兮木葉丹
儼夫人兮在空山
玉容冠兮紫佩蘭

丁文苑哀辭

許有壬

哈巴實取父字姓丁
字文苑于闐人與予
同登乙卯進士第
倅固安州掾左司除
禮部主事予佐吏部
故遊從

為多改祕書著作拜監察御史又與予同官南坡之變
梟獍黨與列據津要文苑康里子山暨予實同論列遷
戶部員外郎予在左司計事率相見俄僉浙西道廉訪
司事遂間南北予居武昌適移湖北新制憲官各色用
止一人長憲者同出西域即日引退臺報不允文苑曰
無例且退持疑文冒進可乎堅卧不起予跼居絕人事
獨相往來鵠山楚觀之絕頂梵宮琳宇之僻地荒城廢
壘村居埜池靡不至焉時絕江登大別宿郎官湖賦詩

談論無虛日一日把酒相属曰人生離合有數君閒我
退針芥相投但恐造物見妒不終遂此先子監祁陽縣
有惠政潜德未章子亟銘之予不獲辭焉未幾予除兩
淮轉運使文苑移山北邸報同日至山北置大寧古白
霄地去京師東北尚八百里陸不可挈家水縈紆五千
里扶病擁幼殆不能為謀予官揚州崎嶇來過曰我非
瀆于進也主上新政不敢不行而老幼累我且都而杭
杭而鄂鄂又山北有力且疲况貧乎鄂不可留揚米貴

亦不可居杭吾樂之穀又差賤且其人德我吾謀定矣
迺命諸子買舟而東獨挈一小僕乘傳而北予留之飲
三晝夜而後去酒中嘗曰我作事素勇今殊猶豫何也
予戲之曰人改常不佳君豈厭世耶迺笑曰昔溫公記
宋子才暴謔其言偶驗我不信也因出臂示其堅實曰
斧吾擊亦不死也於虜今乃真死矣蓋時方大疫暑行
至東平主僕皆病歸抵淮安卒于舟中至順元年六月
二十三日也邵大夫率其國人蔽之予既為位哭遣人

省其墓告其冢子慕高迎柩歸艤舟餞別之地哭為之
慟監縣公葬祁陽遠不能耐予欲蜀岡買地處之慕高
曰杭西山先人所愛因可守也遂謀葬焉母子力不能
舉漕司暨他官府若嘗往來共賻之得楮幣中統萬餘
緡既襄事餘可經理其家淮東憲長谷里麻嘗同官閔
其貧請賻于朝不報初文苑為固安隸京號難治民劉
奉益橫甚賽祈烹五十羊聚郡不逞震動里門執而發
其椎埋焚剽數十事度不解逸去反肆誣構詔大官雖

問禁中辯折明直劉寘于法築堤堰三百里河以不害
兩道凜然折強暴如拉朽蜀兵未戢按部直要衝布置
施為若老于兵者統兵省臣薦其有將帥材可治邊事
云內外持憲知無不言制吏輩噤不得出一語平居論
事慷慨歷落一坐盡傾遇事則奮發勇往無前長于觀
人某邪某詐默以相告後輒多驗作歌行豪宕如其人
古詩清粹皆可傳也延祐初朝廷始以科舉取士天下
之大才五十五人出官四方或懦于施或汚于賄歷歷

在人得免詬議如文苑者可數而天復中道畫之於虜
惜哉予昔銘監縣公謂其多善未報當在文苑今文苑
壽才四十有七贊志以沒此又何邪豈天又尼其身而
大其後邪天道是邪非邪予益惑矣嘗獨坐閱同年錄
十六年間為鬼錄者十五人矣尚忍以區區聲利置胸
中乎或者視為四海九州之人恻乎無情予不忍也慕
禹將狀其行實求予為銘而具狀未至為之辭以發其
槩且以寫予哀云天之生才兮亦孔之艱前不知其幾

世兮後復幾年何林林之百萬兮獨斲于賢器方適用
兮陶復不堅雲未雨而掃蕩兮華未實而摧殘豈矰繳
之在天兮惡有翼之高騫冥冥之中兮孰司其權昔君
之北兮歌呼水壖今君之來兮丹旄翩翩藥善匪良兮
道路迢迢妻子睽隔兮良友棄捐我哀曷忘兮我言曷
殫西山蒼蒼兮惟所便安玉樹森立兮澤流有原冀伸
于後兮以報其前破不可完兮逝不可旋惟生無愧兮
雖沒猶存脩短有數兮吾其舍旃馬草牖下兮非蟻則

鳶九原有知兮其然不然

謚議

何忠肅公謚議

榮祖

虞集

嘗聞善相天下者蓋必本忠厚之心廓容受之量明事
理之識周經營之材極久遠之慮躬負荷之責而後可
庶幾也是故待事有先幾應變有餘智持久有定功處
物有成謀其功業始可得而論矣若命與時遇位以倖
致者亢數之羞欺世之禍彼且無逃于天地之間生民

何賴焉觀于至元大德之間以大臣贊國論不為近利
細故所動搖本之以祖宗之舊典定之以禮律之微意
以成天下之務者平章政事何公何可少耶公為御史
中丞時權臣用事數為所危公守職不變終以是去位
天下之望固已在公矣成宗皇帝在位諤哲公之威重
沈毅達爾罕公之仁明正大實相左右朝多君子正人
而公獨以耆老精練彌縫條理于其間豈漫焉嘗試而
為之者哉卒能成太平之盛非偶然也然于是時好功

興利之徒間出其間偵國家財用之急積慮密講將有所作為議數上公必正坐堂上奮仁者之勇明目張膽論民命國體之所以然發言折其謀使不得行耕田鑿井之民晏然無所顧慮以遂其生理于當時者公存心之最著者也敬歷臺省數十年皆要官重任然衣服飲食之奉儉約不異于儒素身死之日賜金給用之外略無餘貲此其立志非常人所及宜其所成就如此謹按謚法廉方公正曰忠執心決斷曰肅請易公名不亦宜

乎

陳文靖公謚議

儼

虞集

昔者有道之君子內克然而有餘無所待乎外也未嘗求用于世亦未嘗不求用于世也有天下國家者知其有道尊敬而信用之則為之出於是用之以文學政事隨施而見不為喜幸不用則不為變移其志大矣然或者假事以自售已見用而無足以行也則以偃蹇日取盛名終身不一試謂古今為可誣也耶故翰林學士陳

公方盛年時閉戶讀書未始有求用之心及為朝廷所用諄諄然視其職事之所在而謹奉之略無厭常喜竒高自標致之意始終清要蓋迫而後動動而後應定而後就恒無心于其間此其視無能而求用避事而取名以傲忽欺罔一時者為何如也故其高文大冊以華國者皆舒遲溫厚之言橫經論道以淑人者皆文質兼備之教論禮則欲脩一代之經司刑則知先無訟之本至于處已接物溫恭退讓君子視之則樂其雍容小人仰

之則失其鄙暴謂之大儒先生斯無忝矣謚法道德博聞曰文仕不躁進曰靖謚曰文靖其合公之行也哉

姚文公謚議

燧

柳貫

天地真元之氣一會則聖神代作揚熙秉耀乘華協瑞以開太平而必有不世出之臣挺身其間攬結粹精敷為制述于以增煥盛德大業而聳之三五載籍之上蓋數百年而得一二人焉其有關於氣運者如是豈徒乎文哉乃若先正魏國許文正公之在吾元實當世祖皇

帝恢拓基圖之始倡明道宗振起來學一時及門之士
獨稱集賢大學士姚公燧為能式纂厥緒以大具承然
觀公之言而考夫文正之學則其機籥之相須殆不啻
山鳴而谷應雲起而龍翔也故大德至大皇慶之間三
宗繼照天下又寧而公之文章蔚為宗匠典冊之雅奧
詔令之深淳固已抉去浮靡一返古轍而銘志箴頌之
雄偉光潔凡鏤金刻石昭德麗公者又將等先秦兩漢
而上之以闕夫作者之域排沮詆訾不一二而家傳人

誦已十百雖欲揜之孰得揜之哉他日良史執筆以傳
儒林則公在文正之門豈直儕之游夏而已也易曰黃
裳元吉文在中也然則以之節惠公奚歎焉謹按謚法
博文多見曰文敬直慈惠曰文請謚之曰文

蕭貞敏公謚議


糾

劉致

聖王之治天下也必有所不召之臣蓋志意脩則驕富
貴道義重則輕王公蟬蛻塵埃之中翱翔萬物之表不
事王侯高尚其事者以之傳曰舉逸民天下之民歸心

焉故必蒲車旌帛側席以俟其至冀以勵俗興化猶或
長往而不返亦有既至而不屈則束帛戔戔賁于丘園
者治天下者以之也于吾元得二人焉曰容城劉因京
兆蕭軺君始由平章咸寧王野仙薦世祖徵不至授陝
西儒學提舉繼而成宗武宗仁宗累徵授國子司業集
賢直學士未赴改集賢侍講又以太子右諭德徵始至
京師授集賢學士國子祭酒諭德如故尋得告還山年
七十七以壽終士君子之趣向不同期各得所志而已

彼不求人知而人知之不希世用而世用之至于上徹
帝聰鶴書天出辟蘿動色巖戶騰輝猶堅卧不起不得
已焉始一至卒不撓其節不隳所守而去亦可謂得所
志也已方之于古則嚴光周黨之流亞歟雖其道不周
于用而廉頑立懦勵俗興化之功亦已多矣且其累徵
而不起暫出而卽歸不旣貞乎以勤自居其好古好學
之心不旣敏乎按謚法清白守節曰貞好古不怠曰敏
請謚曰貞敏



元文類卷四十八

欽定四庫全書

集部

元文類卷四十九

詳校官通政使_臣夢吉

助教_臣常循覆勘

總校官庶吉士_臣朱鈐

校對官中書_臣嵇承志

謄錄監生_臣陳瞻燧

欽定四庫全書

元文類卷四十九

元 蘇天爵 編

行狀

中書左丞李忠宣公行狀

姚燧

公諱德輝字仲實世居通之潞縣曾祖某祖全再世不仕考朴尚書吏部主事妣宗夫人三子長德英德芬李公吏部君生三十九年且卒指公謂宗夫人曰吾為吏治獄不任悍鷙刻削人蒙吾力脫罪畧齒平民者衆天

或報施善人是兒其大吾門者勿憂貧且賤公方五歲
哭之如成人家纔儲五升菽夫人春蓬稗為糧芼藜蒐
為菹活之荒歲既就外傳嗜讀書束於貧無以自資輟
業年十六監酒豐州祿食充足旨甘有餘則市筆札錄書
夜誦不休夫人以過耽苦慮傷其孱薄也為滅燭止之
已乃厭糟麴歎曰志士顧安此也耶仕不足以匡君福
民隱不足以驩親善身兩大之間人壽幾何烏可無或
有聞死同腐草木也絕少年輩不游處其所親與率一

時名公碩儒歲丁未用故太傅劉文貞公秉忠薦徵至
潛藩俾侍今皇太子講讀薦故翰林侍讀學士竇默故
宣撫司參議智迂賢皆就徵癸丑先朝封周親割京兆
隸潛藩擇廷臣可理賦者使調軍食實出公從宜使辟
故真州總管高逸民自佐時汪忠烈公始宿兵利州扼
四川衿喉規進取數萬之師仰哺於公乃募民入粟綿
竹散幣集之或給鹽券使歸京兆受直陸輓興元水漕
嘉陵一年而錢粟充棟於軍中宋臣余玠議棄平土即

雲頂運山大獲得漢白帝釣魚青屋苦竹築壘移成都
蓬閬洋夔合順慶隆慶八府州治其上號為八柱不戰
而自守矣感蜀之本實張於斯丁巳深峻用事臣大集
關西河南諸臣入計局以中嘗為潛藩用者文致多方
於公獨無絲髮得己未從南征至鄢留後行營庚申以
為南京經畧使再月又以為北京宣慰使其年皇帝即位
中統改元五月又以為燕京宣撫使燕多劇賊造私
幣雜真行民間陰結死友相誓復仇怨殺人公悉捕誅

之雖中書開府在燕令行禁止多不上白由是忤時相
意以誣去位從北征還守北山諸關三年惡已相反誅
以為山西宣慰使罪權勢之籍民為奴免而良者將千
人至元改元罷宣慰司授公嘉議大夫太原路總管兼
府尹至是潛藩故臣相無有出為二千石吏者上以太
原難治故留居此會我先左丞公當分省遷調山西河
東世職守令即遣諭旨公拜稽首曰陛下以臣堪一縣
俾為令臣烏乎可擇況以千里寄治非材大懼任使不

稱以傷陛下之明敢薄之耶自爾愈益勤勵崇學校以
明人倫表孝節以善風俗逐姦賊以剔民賊裁婚葬俾
師簡儉敦耕桑以富生理之出立社倉以虞水旱之歉
一權度以絕欺詐之攘嚴鼓柝以警竒袤之覬凡可與
民漸摩仁義者無弛不張嘉禾瑞麥六出其境滿秩左
部差功最天下右部考過惟草竊盜不獲一人五年徵
入為右三部尚書人有由訟財而失其兄子者公曰何
疑焉叔殺之也深竟其獄公所信厚及權貴言可撼公

者莫不請求保為衣冠之族無有是也皆漫不為應懸
己俸為賞購之具家人果上變告情狀呈露言者慙服
叔竟以是病死俄轉戶部尚書事無大小必決之一日
書判煩勞指為之蠱七年會上以蝗旱為憂俾錄山西
河東囚行至懷仁民有魏氏發得木偶持告其妻挾左
道厭勝謀殺已經數獄服詞皆自以為不冤公燭其
誣召鞠其妾榜掠一加服不移晷蓋妬其女君謂獨陷
以是罪可以殺之也即直其妻而杖其夫之溺愛受欺

當妾罪死觀者神之或咨賞泣下八年授中奉大夫參知北京行尚書省事九年罷尚書省以故官參知北京行中書省事京南徒水歲泛溢至城下為患公築堤捍之皇子安西王有土關中之明年當十一年奏求公輔己以故官改安西王相至則視瀕涇營牧故地可得數千頃起廬舍疏溝澮其中假牛種田具賦予貧民二千家屯田最一歲入得粟麥石十萬芻橐東百萬公是來也貧不能從妻子留之京師事或上聞賜錢二千緡遣

之明年詔以王相撫蜀其年重慶猶城守東西川各開樞
府合兵數萬人圍之公至成都兩府爭遣使咨受兵食
方畧公危語動之曰宋今既亡重慶以巨擘之地不降
何歸政以公輩利其剽殺不得有子女懼而來耳不然
他日兵未嘗戰及招討畢某偕中使奉璽書來赦最宜
正言明告嚴備止攻以須其至反購得軍吏杖之為偽
得罪懷之入降水陸之師雷鼓繼進實堅其不下也中
使不喻詐計竟以不奉明詔反命如是者皆公輩玩寇

疆場心迹之著白者况復軍政不一相訾紛紛朝夕敗
矣豈能必成功為哉兩府多致金帛子女為謝曰戎捷
與人法令所不禁也公讓不受出未至秦瀘州畔而重
慶圍果潰再退守瀘州十三年秋也明年詔以巴哈與
公代為西川副樞公兼王相大軍既發公留成都供億
食纔支半月賦粟繼之官船不足括商民船千艘日夜
督運其年復瀘州十五年重慶之圍再合踰月即下紹
興南平夔施思播諸山壁水柵隨之皆下而東樞府猶

故將也懲前與西川相觀望致敗惡相屬願獨軍圍合
州初公撫蜀徑東川歸以為重慶帥聞受圍必徵諸屬
州兵盡銳拒守合州宜虛誠使諜人持書曉之兵隨其
後亦制合一奇也即出合俘繫順慶獄者縱之使歸語
州將張珣以天子威德遠著宋室淪亡三宮皆北又頌
聖量含宏錄功忘過能早自歸必取將相與夏呂比又
為書反覆禮義禍福譬解其言以為均為臣也不親於
其子孫合之為州不大於宋之天下子孫舉天下而歸

我其臣顧偃然負阻窮山而曰我忠於所事不亦甚惑乎昔也此州人不自為謀求去就者以國有主寧死不欲身被不義之名故爾得制其死命主令亡猶欲以是行之則戲下以盜賊遇君竊若首以徼福一旦不難也其說累數千百言又約書言為檄刊木於山浮板於江珏未及報而公還王邸至是合遣李興張郃十二人者訶事成都皆獲之當斬復為書縱歸使喻其將王立其言如喻珏者而益剴切興至立亦計夙與東府有深怨懼誅

復遣興等導帥楊獬懷蠟書間至成都降公從兵纔數
百人赴之東府害其來爭有言前歲公為書招珏誠亦
極矣竟不見寤無功而還今立珏牙校也習狙詐不信
人特以計致公來使與吾爭垂成之功延命晷刻耳未
必定降即降公冒吾功而來受何物視我必不汝進公
曰前歲合以重慶存故力可以同惡今也孤絕窮而來
歸亦其勢然吾非攘若功者誠懼汝憤其後服誣以嘗
抗蹕先朝利其剽奪快心於屠城也吾為國活此民豈

計汝嫌怒為哉即單舸濟江薄城下呼立出降安集其民而罷置其吏立德之與金玉飾少艾為謝公曰若以吾為是來耶吾無事乎此其持往餽之東府合人自立而下家繪事之川蜀平復以王相還邸是年王薨公感其受知深而悼夫棄國之蚤也哭之幾不能生十七年詔公與南省參政程某即其地聽思播湖南所訟鎮遠王平田會西南夷羅氏鬼國叛別詔雲南湖南四川合兵三萬人誅之前茅及境矣公曰蠻夷無親為俗吝貪

始由邊將撫之失策積怨以叛好事之臣請加兵誅旁
諸小夷洵懼相擅繼叛者必衆恐非直三萬人能歲月
平也吾賴天子仁聖馳一介之使招之可坐俟其徠豈
必煩兵不及以聞遣安珪止三道兵張孝思諭鬼國降
其酋阿察熟公名問曰是活合州李公耶其言人曰明信
可恃即日受命身至播州降語且泣曰吾屬百萬人不
公惠活寧鬪死不降事畢驛聞上為之開可改鬼國為
順元路以其弟阿利為宣撫使其年王相府罷十一月

二十一日始至黃平是夜也星如斗實館垣外公弗善也歎曰他日嘗夢主烏江今描水適名烏江與是星皆吾死徵也夫吾嘗誦馬伏波老當益壯之言而竒曹武惠為將不殺得今活羅鬼馬革裹尸歸何憾二十七日卒後七日資政大夫中書左丞安西行中書省之命下蠻夷望轎車為位祭且哭者動百千人塗所經男女空家咨嗟聚觀合之安撫使立哀經率吏民迎哭傾振山谷為發百人護喪達興元上聞而悼之贈光祿大夫中書

右丞謚忠宣公賜錢二千緡具葬先妃嗣王遣前僉書
王相府事博羅賻錢五百緡具奠明年僉播州安撫司
事何彥抗章請卹州治之東為廟制曰可薨年六十二
夫人胡氏前公卒今夫人某氏子一人嘉議大夫安西
路總管兼府尹諸軍鄂囉頰也女二人長適嘉議大夫
禮部尚書劉秉恕幼在室嘗槩公平居以先夫人剛嚴
其弟宗亨有小過對衆奮杖撻之不少惜公若何而驩
奉使未嘗有厲色遽言其亦能子哉二兄既位不大耀

於時每分吾有不至以寡乏見告其盡禮姊氏不以語
人人知為姑若從母不以為兄弟也與人交誠易炳白
不張城市機穽不面為許退與他人語必諄諄暴其人
所長而韜其不及至繩檢姦慝奮發忿急不能容其過
然亦未嘗留怨惡於胷中雖舊欲擠己入不測淵者事
已輒忘之畧無校言復意自奉甚薄有積則施之不為
子孫他日計西川副樞上嘗賜以玉帶錦衣錢二千五
百緡止留其服物餘悉分之親戚賓客一日而盡人問

之則曰曩吾家多責券縣官憐而賜償之無負矣吾貴而薄功又可富而厚享耶不思而兩有之神不福人于是告人曰我貧吾利器也故自入官非素所往來有相答報者未嘗恃形勢取一錢直餽再為尚書權臣力能生殺人恥公共事累年足跡獨不及吾門以祿薄用奢為言願奉母錢百金交驩令取子自益卻之亦不為謝王相七年及事先王五年言必切切臣職子道請聞斯行以絕事嫌簡約侍衛以裁浮費無急土木殫匱民力

者中外所饜誦凡人賢而有聞滿調將東歸必薦汲之
王陞秩留之故關輔得士為多皆視為己職當然未嘗
語人由我而然以期見德遇事謹敏好謀善問多不自
用及其末路生人之心愈切取信蠻夷聞其諭招椎結
荷旃竭蹶慕義三道之兵為之抑首思徼利於萬里羞
成功於一介賈星烏江馬革包軀斬木通道昇歸要荒
抑嘗觀今中統以來將相臣死率於其家天下之情稱
其平生所為功高者惜德大者思不過如是而極然未

有若公逢掖死事為世所壯者也嗚呼賢哉又嘗觀古
君臣莫難於合尤莫難於信蓋合或可伺所欲以中而
信則必不可襲取於一時自公始侍潛藩聖皇非遽貴
之地亦嘗身接之面訓之指受之親以細微觀其敬忽
置之糾紛試其理解讐以雷霆察其變常納之汙濁驗
其潔白既久而後知遇也其後三十三年之中或使或
牧或從或留或相或傳諸侯王或將凡賞勲勞優者舊
可以勸人臣者公皆與為之至商論羣臣能否於公不

曰清則曰剛或曰不欺不見有貶於聖訓用未盡年未
耄人猶未足其望受任於已試知遇於既久可與疇咨
海內者將不知誰在也嗚呼悲哉後三年頴彙進遺事
求狀公行燧亦荷公知且久遊其門又與頴嘗同受學
義不得以不文為讓姑為論次如此奉議大夫陝西漢
中道提刑按察副使姚燧謹狀

翰林學士承旨董公行狀

虞集

公諱文用字彥材真定路藁城縣人元帥公第三子也

公生十年元帥公死王事于歸德母李夫人治家嚴伯
兄忠獻公文炳教諸弟有法公內承家訓而外受學侍
其先生軸故學問早成弱冠以詞賦試中真定時以真
定臺城奉莊聖太后湯沐歲庚戌太后使擇邑中子弟
來上公始從忠獻公謁太后和琳城世祖皇帝在潛藩
命公主文書講說帳中常見許重癸丑世祖以憲宗皇
帝命自河西征雲南大理忠獻公在行公與弟壽國正
獻公文忠先在軍中督糧具贊軍務丁巳世祖令授皇

子經是為北平王雲南王也又使為使召遺老於四方而太師竇公默左丞姚公樞鶴鳴李公俊民敬齋李公治玉峰魏公璠偕至於是王府得人為盛己未世祖以憲宗命取宋公發汧邊蒙古漢人諸軍理軍需將攻鄂州宋以賈似道呂文德將兵抗我水陸軍容甚備九月世祖臨江閱戰忠獻公請曰宋恃江為險兵力厚法當先之奪其氣臣請先公與正獻公固請偕行世祖親料甲冑擇大艦授之乃率敢死士數十百人鼓棹疾呼奮

進直薄南岸諸軍亦爭進宋軍來赴戰三合三敗之公
乘小舟歸報世祖世祖方駐香爐峰因策馬下山問戰
勝狀則扶鞍起立豎鞭仰指曰天也即賜卮酒使主帳
下宿衛且令傳令他帥曰今夕毋飲酒毋解甲明日將
圍城既渡江會憲宗崩閏十一月師還庚申世祖即皇
帝位建元中統公持詔宣諭邊郡且擇諸軍充侍衛七
月還朝中書左丞張仲謙宣撫大名等路奏公為左右
司郎中二年八月佩金符以兵部郎中參議都元帥府

事三年山東守臣李璫叛據濟南從元帥闊闊帶統兵伐之五月而克其城璫伏誅山東平元帥卒公還都元帥阿珠奉詔取宋召公為屬公辭曰新制諸侯總兵者其子弟勿復任兵事今伯兄以經畧使總重兵鎮山東我不當行帥曰潛邸舊臣不得引此為說公病不行五年改元至元之歲也上曰董文用其年始壯不使為國効力今安在召授金符為西夏中興等路行省郎中中興自琿塔哈之亂甫定民間相恐動竄匿山谷而省臣

方入奏同僚不知所為公曰吾死不可以去此宜鎮以
靜乃為書置通道諭之然後粗安始開唐來漢延秦家
等渠墾中興西涼甘肅瓜沙等州之土為水田若干於
是民之歸者戶四五萬悉授田種頒農具更造舟置黃
河中受諸部落及潰叛之來降者時近屬貴人曰哲伯
特穆爾者鎮西方其下縱橫需索旁午不可會計省臣
不能支公坐幕府輒面折以國法其徒積忿譖公貴人
怒召使左右雜訊之意叵測公曰我天子命吏請得與

天子所遣傳貴人者辨天子所遣傳貴人者中朝舊臣
嘗事莊聖太后來詰問公不承貴人旨意狀公曰我漢
人生死不足計我所恨者仁慈寬裕如貴人以重威鎮
遠方而其下毒虐百姓凌暴官府傷貴人威名於事體
不便因僂指其不法者數十事詰問者驚起去白貴人
即召公謝之曰非郎中吾殆不知郎中持此心事朝廷
宜勿怠自是譖不行而省府事粗立二年入奏經畧使
宜還以上旨行之中興遂定三年行省罷還京師命公

為中書省左右司郎中辭之五年立御史臺授公山東
東西道提刑按察副使以仲兄右衛親軍千戶文蔚卒
不及赴八年立司農司授公奉訓大夫山東東西道巡
行勸農使十一年三月加朝列大夫勸農使如故山東
中更叛亂多曠土公巡行勸勵無間幽僻入登州境見
其墾闢有方公為詩表異其守移刺令刻石在州治於
是列郡咸勸地利畢興五年之間政績為天下勸農使
之最十二年丞相安圖公奏公為中順大夫工部侍郎

代赫舍哩赫舍哩者阿哈瑪特私人也其徒間安圖公罷政即使鷹監奏曰自赫舍哩去工部侍郎不給鷹食鷹且瘦死矣上怒趣召治之因急逮公入見上望見曰董某顧為爾治鷹食者耶置不問別令取給有司阿哈瑪特知不可諧十三年出公為少中大夫衛輝路總管兼本路諸軍鄂囉總管佩金虎符郡當要衝民為兵者十九餘皆單弱貧病不任力役會初得江南圖籍金玉財帛之運日夜不絕於道警衛輸輓日役數千夫公盡然憂

之曰吾民弊矣而又重妨穡事殆不可乃從轉運主者
言郡邑胥校足備用不必重煩吾民也主者曰公言誠
然即行公言事萬有一不虞罪將誰歸公即為手書具
官職姓名保任之民得以時耕而運事亦無不具者諸
郡運江淮粟於京師衛當運十五萬公曰民籍可役者
無幾且江淮舟行風水不時至而先弊吾民以期會是
未運而民已憊矣乃為集旁郡通議立法驛置民力以
紓十四年以職事詣汴漕司方議通沁水北東合流御

河以便漕者公曰衛為郡地最下大雨時行沁輒溢出
百十里間雨更甚水不得達於河即浸涇及衛今又道
之使來豈惟無衛將無大名長蘆矣會朝廷遣使相地
形上言衛州城中浮屠最高者才與沁水平勢不可開
也事得寢不行為郡多善政民有去思具見郡教授陶
思淵所撰碑文十六年受代歸田里作遐觀之亭於故
丘茅茨數椽僅避風日讀書賦詩怡然燕居自號野莊
老人裕宗在東宮數為臺臣言董某勲舊忠良何以不

見用也十八年臺臣奏起公為山北遼東道提刑按察使不赴十九年朝廷選用舊臣乃召公為大中大夫兵部尚書自是朝廷有大議未嘗不與聞廿年江淮省臣有欲專肆而忌廉察官者建議行臺隸行省狀上集議公議曰不可御史臺譬之卧虎雖未噬人人猶畏其為虎也今司憲僅在紀綱猶不振一旦摧抑之則風采蕭然無可復望者矣又曰前阿哈瑪特用事時商賈賤役皆行賄入官及事敗欲盡去其人廷議以為不可使阿哈瑪特

售私恩而朝廷驟斂怨也及使按察司劾去其不可者
然後吏有所憚民有所赴愬則是按察司者國家當飭
勵之不可推抑也後悉從公議轉通議大夫禮部尚書
遷翰林集賢學士知秘書監時中書右丞盧世榮本以
貨利得幸權要為貴官陰結貪刻之黨將錙銖培克為
功乃建議曰我立法治財視常歲當倍增而民不擾也
詔下會議人無敢言者公陽問曰此錢取諸右丞家耶
將取諸民取諸右丞家則不敢知若取諸民則有說矣

牧羊者歲常兩剪其毛今牧人日剪其毛而獻之則主者固悅其得毛之多矣然而無以避寒熱即死且盡毛又可得哉民財亦有限取之以時猶懼其傷殘也今盡剝剝無遺毳猶有百姓乎世榮不能對丞相安圖公謂坐中曰諸君董尚書真不虛食俸祿者議者出皆謝公曰公以一言折聚斂之臣而厚邦本仁人之言其利溥哉豈不信然世榮竟以是得罪後嘗謂人曰我不知何事忤董尚書每折我不遺餘力廿二年拜中奉大夫江

淮等處行中書省參知政事公力辭上前曰江淮事劇臣不敢當上曰卿家世非他人比朕所以任卿者不在錢穀細務也卿當察其大者事有不便第言之公不敢辭遂行行省長官者素貴倨多傲同列莫敢仰視跪起稟白如小吏事上官公則坐堂上侃侃與論是非可否無所遷就雖數忤之不顧也有以上命建浮屠於亡宋故宮者有司奉行急迫天大雨雪入山伐木死者數百人而猶欲併大建佛寺公坐中謂其人曰非時役民民不

堪矣少徐之如何長官者曰參政奈何格上命公曰非
格上命也今日重困民力失民心豈上意耶各拂袖去
然竟得少紓其程公在行省政事大槩如此廿三年將
用兵海東徵斂益急有司為姦日益甚公曰吾力不足以
口語勝矣乃請入奏事大畧言疲國家可實之民力取
僻陋無用之小邦其條目甚悉言上事亦罷廿五年拜
御史中丞公曰中丞不當理細務吾當先舉按察使乃
舉胡公祗適王公憚雷公膺荆幼紀許楫孔從道十餘

人為按察使又舉徐公琰魏公初為行臺中丞當時以
為極選方是時僧格當國用事寵奉方熾自近戚貴臣
見僧格皆屏息遜避無可誰何公以舊臣任御史號不
易為僧格令人風公贊已功於上前公不答又自謂公
曰百司皆具食丞相府獨御史臺未具食丞相府公又
不答屬朔方軍興糧糗粗備而誅責逾急公謂之曰民
急矣外難未解而內戕其根本丞相宜思之於是遠近
盜賊蜂起公持外郡所上盜賊之目謂之曰百姓豈不

欲生養安樂哉急法苛斂使至此耳又謂之曰御史臺所以揀政事之不及丞相當助之不當抑之也御史臺不得行則民無所赴愬而政日亂將不止臺事不行也浸忤其意益深乃掀拾臺事百端公日與辯論不為屈於是具奏僧格姦狀詔報公語密外人不知也僧格日誣譖公於上曰在朝惟董中丞慙傲不聽令沮撓尚書省請痛治其罪上曰彼御史職也何罪且董某端謹朕所素知汝善視之當是時雖貴近以誣譖遭斥辱者不

一公徒以區區之誠賴天鑒主知而免於是遷公通奉大夫大司農時又欲奪民田為屯田公固執不可則又遷公為翰林學士承旨廿七年隆福太后在東宮以公耆舊欲使公授皇孫以經具奏上以上命命之曰老人畏寒須暄和乃一至帳中授經內侍視饌公每講說經旨必傳以國朝故實丁寧譬喻反覆開悟故皇孫亦特加崇禮焉三十一年上命公以其諸子入見公曰臣蒙國厚恩死無以報臣之子何能為謹不敢以見命至再

三終不以見是歲世祖皇帝升遐公望宮牆哀慟幾墜
馬下同列爭持扶之及致奠喪次羣臣皆推公曰先帝
漢人舊臣惟公在矣公宜前受酒行禮皆相對哭失聲
今上將即皇帝位於上都太后命公從治裝賜鈔百定
以行既即位巡狩三不刺公奏曰先帝新棄天下陛下
遠狩不以時還無以慰安元元宜趣還京師且臣聞人
君猶北辰然居其所而衆星拱之不在勤遠畧也上悟
即日可其奏是行也上每召入帳中問先朝故事公亦

盛言先帝虛心納賢開國經世之務談說或至夜半太后亦素知公故多所顧問公自先帝時每侍宴與蒙古大臣同列裕宗嘗就榻上賜酒使毋下拜跪飲皆異數也上在東宮時正旦受賀於衆中見公召使前曰吾鄉見至尊甚憐汝輒親取酒飲之至是眷賚至渥賜鈔三百定至於錦衣玉帶紫笠寶環之賜皆追成先帝之意也是年詔修先帝實錄陞資善大夫知制誥兼修國史公於祖宗世系功德戚近將相家世勲績皆記憶貫穿史館有所


考訂質問公應之無所遺失大德元年夏四月上章言
臣老矣請致其事上聞之特加資德大夫許致仕賜鈔
二百定以歸命一子官鄉郡便侍養六月戊寅以疾薨
於里第之正寢享年七十有四公性孝友四時祭祖禰
輒思慕感愴如將見之事伯兄如事父教子弟嚴而有
禮為學以誠實為主本故其文章議論皆質直忠厚不
為華靡其從政寬裕慈愛簡於細務至於謀大事決大
議則剛毅正直磊落可觀歷事三朝每以忠言正論為

已任故言事上前必引古證今從容盡達其蘊而後已
平居聞朝政有一未善輒終夜不寐倚壁歎恨不置曰
祖宗艱難成立之天下豈可使賊臣壞之故每與朝議
即奮言不顧危禍以片言折權姦定國是者不可勝紀
朝廷賴之在御史臺行中書省時所遭皆大姦劇惡每
恨公不順己計萬方欲殺之公一不以為意曰人臣在
位豈愛身苟容而上負國家下負生民乎公仕宦五十
餘年凡十八命祿俸之餘盡以買書而家無饘粥之資

卒賣其京城之宅以償積貸世祖嘗念其貧每欲有所
賜使近臣記其事然公終不一自言也逮薨之日惟有
祭器書冊而已其好賢樂善尤出天性雖待下士必盡
禮至老且貴終不倦人有善必推舉之而名公大人聞
公所薦亦必曰出董公門必佳士也故天下之士爭歸
之與人謀至忠款故國人有為使遠方若出而領兵治
民者必來受教而後行公為開導訓誨足以歆動其意
至有欣然聽之終日忘去者而蒙古大臣見之必曰此

故老也皆改容待之嗚呼蓋可謂忠厚誠實君子者矣
公先娶王氏元帥某之女先卒再娶周氏江淮都轉運
使惠之次女後公四月卒子男八人士貞士亨為仲兄
文蔚後渡江有功官至昭勇大將軍侍衛親軍副都指
揮使佩金虎符常侍裕宗東宮先公卒士偕士英士昌
士恒承務郎真定路總管府判官士廉士方女四人長
適趙玘次適周俶次適齊東縣尹王良傑次在室孫男
十六人守約某某孫女十人長適吳某次適張繼祖次

適侍其正次適王惟賢餘在室曾孫男七人皆幼公墓
兆在縣西北高里先塋之東公國之老臣敷歷中外久
矣上而朝廷下及四方賢大夫士宜必有深知公者尚
能道其德業之詳也謹錄其歷官行事梗槩如上伏惟
立言之君子圖其不朽者焉謹狀大德十年三月某日
大都路儒學教授虞集狀



元文類卷四十九

欽定四庫全書

元文類卷五十

詳校官通政使_臣夢吉

助教_臣常循覆勘

總校官庶吉士_臣朱鈐

校對官典簿_臣郭祚熾

謄錄監生_臣莫與儔

欽定四庫全書

元文類卷五十

元 蘇天爵 編

行狀

知太史院事郭公行狀

齊履謙

公諱守敬字若思順德邢臺人生有異操不為嬉戲事
祖榮號鴛水翁通五經精於筭數水利時太保劉文貞公
左丞張忠宣公樞密張公易贊善王公恂同學於州西紫
金山而文貞公復與鴛水翁為同志友以故俾公就學於

文貞所先是順德城北有石橋以通達活泉水兵後橋為泥潦淤沒失其所在公甫冠為之審視地形按指其處而得之河東元公裕之文其事於石其曰里人郭生者即公是也中統三年張忠宣公薦公習知水利且巧思絕人蒙賜見上都使殿公面陳水利六事其一中都舊漕河東至通州權以玉泉水引入行舟歲可省餽車錢六萬緡通州以南於蘭榆河口徑直開引由蒙村跳梁務至楊村還河以避浮難洶盤淺風浪遠轉之患其二順德達活泉開入

城中分為三渠引出城東灌溉其地其三順德澧河東至古任城失其故道沒民田一千三百餘頃此水開脩成河其田即可耕種其河自小王村經淳沱合入御河通行舟楫其四磁州東北滏漳二水合流處開引由滏陽邯鄲洺州永年下經雞澤合入澧河其間可溉田三千餘頃其五懷孟沁河雖已澆溉尚有漏堰餘水東與丹河餘水相合開引東流至武陟縣北合入御河其間灌田二千餘頃其六黃河自孟州西開引少分一渠經由新舊孟州中間順

河古岸下至溫縣南復入大河其間亦可灌田二千餘頃
每奏一事上輒曰當務者此人真不為素餐矣即授提舉
諸路河渠四年加授銀符副河渠使至元改元從忠宣公
行省西夏興復瀕河諸渠先是西夏瀕河五州皆有古渠
其中興州者一名唐來長袤四百里一名漢延長袤二
百五十里其餘四州又有正渠十長袤各二百里支渠大
小共六十八計溉田九萬餘頃兵亂以來廢壞淤淺公為
之因舊謀新更立隄堰役不踰時而渠皆通利夏人共為

立生祠於渠上二年授都水少監公言嚮自中興還特命
衆順河而下四晝夜至東勝可通漕運及見查泊烏梁海
古渠甚多可為脩理又言金時自燕京之西麻谷村分引
盧溝一支東流穿西山而出是謂金口其水自金口以東
燕京以北溉田若干頃其利不可勝計兵興以來典守者
懼有所失因以大石塞之今若按視故迹使水得通流上
可以致西山之利下可以廣京畿之漕上納其議公又言
當於金口西預開減水口西南還大河令其深廣以防漲

水突入之患衆服其能八年遷都水監十二年丞相伯顏
公南征議立水驛命公行視所便自陵州至大名又自濟
州至沛縣又南至呂梁又自東平至綱城又自東平清河
逾黃河故道至與御河相接又自衛州御河至東平又自
東平西南水泊至御河乃得濟州大名東平泗汶與御河
相通形勢為圖奏之十三年都水監併入工部遂除工部
郎中是歲立局改治新厯先時太保劉公以大明厯自遼
金承用二百餘年浸以後天議欲脩正而薨至是江左既

平上思用其言遂以公與贊善王公率南北日官分掌
測驗推步於下而忠宣樞密二張公為之主領裁奏於
上復共薦前中書左丞許公能推明厯理俾參預之公
首言歷之本在於測驗而測驗之器莫先儀表今司天
渾儀宋皇祐中汴京所造不與此處天度相符比量南
北二極約差四度表石年深亦復欹側公乃盡考其失
而移置之既又別圖爽塏以木為重棚創作簡儀高表
用相比覆又以為天樞附極而動昔人嘗展管望之未

得其的作候極儀極辰既位天體斯正作渾天象象雖形似莫適所用作玲瓏儀以表之矩方測天之正圓莫若以圓求圓作仰儀石有經緯結而不動公則易之作立運儀日有中道月有九行公則一之作證理儀表高景虛罔象非真作景符月雖有明察景則難作闕凡厯法之驗在於交會作日月食儀天有赤道輪以當之兩極低昂標以指之作星畧定時儀以上凡十三等又作正方案九表懸正儀座正儀凡四等為四方行測者所

用又作仰規覆矩圖異方渾蓋圖日出入永短圖凡五等與上諸儀互相參考十六年改局為太史院以贊善公為太史令公為同知太史院事給印章立官府是年奏進儀表式樣公乃對御前指陳理致一周悉自朝至於日晏上不為倦公因奏唐一行開元間令南宮說天下測景書中見者凡十三處今疆宇比唐尤大若不遠方測驗日月交食分數時刻不同晝夜長短不同日月星辰去天高下不同即日測驗人少可先南北立表取

直測景上可其奏遂設監候官一十四員分道相繼而出先測得南海北極出地一十五度夏至景在表南長一尺一寸六分晝五十四刻夜四十六刻衡岳北極出地二十五度夏至日在表端無景晝五十六刻夜四十四刻岳臺北極出地三十五度夏至景長一尺四寸八分晝六十刻夜四十刻和林北極出地四十五度夏至景長三尺二寸四分晝六十四刻夜三十六刻鐵勒北極出地五十五度夏至景長五尺一分晝七十刻夜三

十刻北海北極出地六十五度夏至景長六尺七寸八
分晝八十二刻夜一十八刻繼又測得上都北極出地
四十三度少北京北極出地四十二度強益都北極出
地三十七度少登州北極出地三十八度少高麗北極
出地三十八度少西京北極出地四十度少太原北極
出地三十八度少安西府北極出地三十四度半強興
元北極出地三十三度半強成都北極出地三十一度
半強西涼州北極出地四十度強東平北極出地三十

五度太大名北極出地三十六度南京北極出地三十
四度太強陽城北極出地三十四度太弱揚州北極出
地三十三度鄂州北極出地三十一度半吉州北極出
地二十六度半雷州北極出地二十度太瓊州北極出
地十九度太十七年新厯告成拜太史令公與太史諸
公同上奏曰臣等竊聞帝王之事莫重於厯自黃帝迎
日推策帝堯以閏月定四時成歲舜在璇璣玉衡以齊
七政爰及三代厯無定法周秦之間閏餘乖次西漢造

三統歷百三十年而後是非始定東漢造四分歷七十
餘年而儀式方備又百二十一年劉洪造乾象歷始悟
月行有遲速又百八十年姜岌造三紀甲子歷始悟以
月食衝檢日宿度所在又五十七年何承天造元嘉歷始
悟以朔望及弦皆定大小餘又六十五年祖沖之造大明
歷始悟太陽有歲差之數極星去不動處一度餘又五
十二年張子信始悟日月交道有表裏五星有遲疾留
逆又三十三年劉焯造皇極歷始悟日行有盈縮又三

十五年傅仁均造戊寅元厯頗采舊儀始用定朔又四十六年李淳風造麟德厯以古厯章部元首分度不齊始為總法用進朔以避晦晨月見又六十三年僧一行造大衍厯始以朔有四大三小定九服交食之異又九十四年徐昂造宣明厯始悟日食有氣刻時三差又二百三十六年姚舜輔造紀元厯始悟食甚泛餘差數以上計千一百八十二年厯經七十改其創法者十有三家自是又百七十四年欽惟聖朝統一六合肇造區夏

專命臣等改治新厯臣等用創造簡儀高表憑其測到實數所考正者凡七事一曰冬至自丙子年立冬後依每日測到晷景逐日取對冬至前後日差同者為準得丁丑年冬至在戊戌日夜半後八刻半又定丁丑夏至得在庚子日夜半後七十刻又定戊寅冬至在癸卯日夜半後三十三刻己卯冬至在戊申日夜半後五十七刻半庚辰冬至在癸丑日夜半後八十一刻半各減大明厯十八刻遠近相符前後應準二曰歲餘自劉宋大

明厯以來凡測景驗氣得冬至時刻真數者有六用以相距各得其時合用歲餘今考驗四年相符不差仍自宋大明壬寅年距至今日八百一十年每歲合得三百六十五日二十四刻二十五分其二十五分為今厯歲餘合用之數三曰日躔用至元丁丑四月癸酉望月食既推求日躔得冬至日躔赤道筭宿十度黃道筭九度有畸仍憑每日測到太陽躔度或憑星測月或憑月測日或徑憑星度測日立術推算起自丁丑正月至己卯

十二月凡三年共得一百三十四事皆躔於算與月食相符四曰月離自丁丑以來至今憑每日測到逐時太陰行度推算變從黃道求入轉極遲極疾并平行處前後凡十三轉計五十一事內除去不真的外有三十事得大明厯入轉後天又因考驗交食加大明厯三十刻與天道合五曰入交自丁丑五月以來憑每日測到太陰去極度數比擬黃道去極度得月道交於黃道共得八事仍依日食法度推求皆有食分得食時刻與大明

所差不多六曰二十八宿距度自漢太初厯以來距度不同互有損益大明厯則於度下餘分附以太半少皆私意牽就未嘗實測其數今新儀皆細刻周天度分每度為三十六分以距線代管窺宿度餘分並依實測不以私意牽就七曰日出入晝夜刻大明厯日出入晝夜刻皆據汴京為準其刻數與大都不同今更以本方北極出地高下黃道出入內外度立術推求每日日出入晝夜刻得夏至極長日出寅正二刻日入戌初二刻晝六

十二刻夜三十八刻冬至極短日出辰初二刻日入申
正二刻晝三十八刻夜六十二刻永為定式所創法凡
五事一曰太陽盈縮用四正定氣立為升降限立招差
求得每日行分初末極差積度比古為密二曰月行遲
疾古厯皆用二十八限今以萬分日之八百二十分為
一限凡析為三百三十六限依垛疊招差求得轉分進
退其遲疾度數逐時不同蓋前所未有三曰黃赤道差
舊法以一百一度相減相乘今依算術勾股弧矢方圓

斜直所容求到度率積差率與天道實為脗合四曰
黃赤道內外度據累年實測內外極度二十三度九十
分以圓容方直矢接勾股為法求每日去極與所測相
符五曰白道交周舊法黃道變推白道以斜求斜今用
立渾比量得月與赤道正交距春秋二正黃赤道正交
一十四度六十六分擬以為法推逐月每交二十八宿
度分於理為盡十九年太史王公卒時厯雖頌然其推
步之式與夫立成之數尚皆未有定橐公於是比次篇

類整齊分抄裁為推步七卷立成二卷厯議擬彙三卷
轉神選擇二卷上中下三厯註式十二卷二十三年繼
為太史令遂上表奏進又有時候箋註二卷修改源流
一卷其測驗書有儀象法式二卷二至晷景考二十卷
五星細行考五十卷古今交食考一卷新測二十八舍
雜座諸星入宿去極一卷新測無名諸星一卷月離考
一卷並藏之官二十八年有言漕事便利者一謂灤河
自永平挽舟踰嶺而上可至上都一謂盧溝自麻谷可

至尋麻林朝廷令各試所說其謂灤河者至中道自知
不可行而罷其謂盧溝者命公與往亦為峭石所阻舟
不得通而止公因至上都別陳水利十有一事其一大
都運糧河不用一畝泉舊源別引北山白浮泉水西折
而南經瓮山泊自西水門入城環匯於積水潭復東折
而南出南水門合入舊運糧河每十里一置牖比至通
州凡為牖七距牖里許上重置斗門互為提闕以過舟
止水上覽奏喜曰當速行之於是復置都水監俾公領

之首事於二十九年之春告成於三十年之秋賜名曰
通惠役興之日上命丞相以下皆親操畚鍤為之倡咸
待公指授而後行事置牖之處往往於地中偶值舊時
軌木時人為之感服船既通行公私省便先是通州至
大都陸運官糧歲若干萬石方秋霖雨驢畜死者不可
勝計至是皆罷是秋車駕還自上都過積水潭見其舳
艦蔽水天顏為之開懌特賜公錢一萬二千五百緡仍
以舊職兼提調通惠河漕運事公又欲于澄清牖稍東

引水與北填河接且立牖麗正門西令舟楫得環城往來志不就而罷三十一年拜昭文館大學士知太史院事大德二年召公至上都議開鐵幡竿渠公奏山水頻年暴下非大為渠堰廣五十步不可執政吝於工費以公言為過縮其廣三之一明年大雨山水注下渠不能容漂没人畜廬帳幾犯行殿翌日天子北狩謂宰臣曰郭太史神人也可惜不用其言七年詔內外官年及七十並聽致仕公以舊臣且朝廷所施為獨不許其請

至今翰林太史司天官不致仕者咸自公始延祐三年
某月日卒年八十六公以純德實學為世師法然其不
可及者有三一曰水利之學二曰厯數之學三曰儀象
制度之學決金口以下西山之棧而京師材用是饒復
唐來以溉瀕河之地而靈夏軍儲用足引汶泗以接江
淮之派而燕吳漕運畢通建斗牖以開白浮之源而公
私陸費由省又前後條奏便宜凡二十餘事相治河渠
泊堰大小數百餘所其在西夏嘗挽舟遡流而上究所

謂河源者又嘗自孟門以東循黃河故道縱廣數百里間皆為測量地平或可以分殺河勢或可以灌溉田土具有圖誌又嘗以海面較京師至汴梁地形高下之差謂汴梁之水去海甚遠其流峻急而京師之水去海至近其流且緩其言信而有徵此水利之學其不可及者也古歷天周與歲周小餘同於日度四分之一漢魏以來漸覺不齊遂有破分之說而立法未均任意進退公乃每以百年為率小餘之下增損各一以之上推往古

下驗方來無不脗合且自太初迄于大明名厯七十餘家其見施用於世者四十有三類多寫分換母誇誑一時間有翹出如宋元嘉唐大衍近世紀元不過三數然亦未臻至當考驗天事始雖精密旋已不效公所為厯測驗既精設法詳備行幾五十年未嘗一有先後天之差去積年日法之拘無寫分換母之陋此厯數之學其不可及者也舊儀既多蔽礙且距齒但有度刻而無細分以管望星漸外則所見漸展尤難取的公所為儀但

用天常赤道四游三環三距設四游於赤道之上與相套在內同附直距於四游之外與雙環兩間同結線距端凡測日月星則以兩線相望劈取其正中所當之刻之度之分之杪之數舊八尺謂夏至之景尺有五寸千里而差一寸其說見於周官周髀等書千里而差一寸唐一行已嘗駁議八尺之表表庠景促古今承用未之或革公所為表五倍其舊懸施橫梁每至日中以符竅夾測橫梁之景折取中數與舊表但取表之景者殊為

審當公於世祖朝進七寶燈漏今大明殿每朝會張設之其中鐘鼓皆應時自鳴又嘗進木牛流馬雖不盡得諸葛舊制亦自機妙成宗朝進櫃香漏又作屏風香漏行漏以備郊廟從幸大德二年起靈臺水渾蓮渾天漏大小機輪凡二十有五皆以刻木為衝牙轉相撥擊上為渾象點畫周天星度日月二環斜絡其上象則隨天左旋日月二環各依行度退而右轉公又嘗欲倣張平子為地動儀及候氣密室事雖未就莫不究極指歸此

儀象制度之學其不可及者也初公年十五六得石本蓮花漏圖已能盡究其理及隨張忠宣公奉使大名因大為鼓鑄即今靈臺所用銅壺又得尚書璇璣圖規竹箴為儀積土為臺以望二十八宿及諸大星及夫見用觀其規畫之簡便測望之精切功智不能私其議羣衆無以參其功王太史剛克自用者也每至公所覩其匠制未嘗不為之心服魯齋先生言論為當代法因語及公以手加額曰天祐我元似此人世豈易得嗚呼其可

謂度越千古矣

濟南路大都督張公行狀

張起巖

公張姓諱宏字可大世為濟南人祖榮屬金季喪亂保
民辟鄒平縣之黌堂嶺國兵下版其軍民五十餘萬歸
款以勞績始受命為東諸侯安集流亡政尚仁厚所部
殷足而境內以治庚寅歲覲太宗皇帝賜錦衣三襲坐諸
侯王上從攻河南睢陽沛徐邳獲其究王國用安伐宋
破棗陽仇城六安未嘗濫及無辜以言脫民於兵者甚

衆世祖臨御詢開國有功臣首及之優詔獎勵以濟南公致仕有慶及子孫長保河山之誓之語考邦傑襲爵勤於撫字凡可以裕民生植邦基者力陳于上賦之病民者數請蠲貸皆報可且以新造金虎符異金織幣服賜之而民或不堪賦及不得請至均為代輸之流民以歸疲瘵以蘇事集而人不擾朝廷考課為天下最乃割河間之將陵臨邑等六處以旌治績乃升將陵為州初以質子侍王藩娶夫人阿克展氏生公性長厚自幼嶷然

有成人風長博通諸國語及嗣為政一以繼志述事為心屬歲大旱徒步四十里禱雨龍洞既莫而雨霑足其在軍旅拊循士卒號令嚴明于襄于揚累奏戰功世祖皇帝在王邸總率兵伐宋公為前鋒得生口輒詢山川地形途所從出城郭向背主將誰某倉廩所實幾何守兵幾何一一為上陳之且逆策其可勝之狀畫其進取當自某處用兵若干若指諸掌暨捷卒如所策上每曰汝殆身親歷耶何其言之信也拔木欒山寨獲男女萬

餘口咸釋之俾復生聚宋人以王師之至所向款附至陽羅堡上視師江北岸小山公進言彼宋舟師雖衆我以四百艘可必取之請偕水軍先濟江許之奪其大船名白鷁者一大戰江中連勝我師增氣其偏將以二百艘直抵南岸宋師奔潰而公之北斗旗已樹矣上隨整諸軍渡江至鄂州公啓城東南維彼悉衆守禦號難攻請先諸軍以攻彼既下則城自陷矣攻之登其陴宋人悉力來奪公連戰復破之城遂陷上命公籍府庫秋毫

不私師旋部降民數千徙之內地嬰孺無失或有疾命
醫視之皆全活上正位宸極有詔若曰乃祖為國有收
撫之勲治郡存節儉之業其父相繼致力於民承襲至
卿餘風尚在又隨朕南進殊有功勞可遵奉先朝聖旨
依舊懸帶虎符授濟南府行軍萬戶管民總管之職凡
在所屬並聽節制敬持朕命慎守鄉司中統三年春李
瑄叛兵起益都率逆徒數萬擣濟南前此公億知其端
條其逆跡等十事大畧以為諸路城壁不脩而益都因

澗為城國初以全師攻之數年不下今更包以磚石而儲粟於內且留壯丁之轉輸者于府其志欲何為哉又諸路兵久從征伐不得休息率皆困弊而璫假都督之重擁彊兵至五七萬日練習整厲名為討宋而實不出境士卒惟知璫之號令不復知稟朝廷之命平章王統故璫參佐儻中外連構窺伺間隙以逸待勞此尤可慮又大駕前歲北征羣臣躬扞牧圉而璫獨以禦宋為辭既不身先六軍復無一校以從本欲休養士卒以覘

國家虛實及駕還京師諸侯朝覲璫又不至不臣之心
路人共知國家去歲遣使往宋實欲百姓休息璫獨不
喜其和奸欺叵測方發兵邊境下竊兵威上失國信又
如市馬諸路無論軍民槩屬括買獨不及益都而璫方
散遣其徒於別境高其直以市其王文統與璫締交於
此尤著又中統鈔法諸路通行惟璫用漣州會子所領
中統鈔顧於臣境貿易諸物商人買鹽而鈔不見售又
山東鹽課之額歲以中統鈔計為三千五百定近年互

為欺誑省為二千五百定餘悉自盜屬法制初新宜復
舊額而欺盜仍前又前歲王師渡江宋人來禦璫乘其
隙偶陷漣州輒貪其功悲留歲賦為括兵用而又侵及
鹽課誠使璫絕淮南而南歲陷一二城壁去杭尚遠方今
急務正不在此而徒以兵賦假之不可不慮今亟宜罷
王文統而擇人代璫且徵璫從攻西北足以破其姦謀
必東南須璫鎮戍刺真督兵西南緩急豈能相及又不
若掇璫北行為策之善也如或不然尚宜中設都督內

足以分其勢而伐其謀外足以鼎立而禦侮也公以其言祕俟燕間以間二年元會上命公酒知公意有所陳謂之曰卿比還當陛見朕與卿有言也十六日上獵近郊宿郊壇旁夜召公與語公遂具奏上諭近侍以軍國密計毋泄至是壇兵西來城守之卒數不滿千公遂偕其祖濟南公告變京師半道詔以諸王合必赤總兵擊之有旨諭衆安業俾郡縣兵從公討賊割山東鹽課以濟師仍戒諸道兵毋肆侵掠以公為前導而壇已據濟

南諸道兵既合詔無攻城以傷吾民乃築城周六十里
圍之璫既不得出公率卒青齊境上斷其饟道攻下寨
柵脅從之民相率歸正逆徒數突圍公及諸軍遮却之
以功遷大都督秋七月甲戌璫伏誅公言濟南民皆王
民城為逆徒盜據今罪人斯得恐軍士例肆虜掠請加
勅兵毋入城於是王遣將分掌門鑰尋有卒褫民婦衣
斬首以徇諸軍肅然至元初例遷真定路總管兼府尹
加鎮國上將軍有故吏掇拾公諸父罪辭連公上以其

有功特原之然猶免所居官九年師次襄陽起公為懷
遠大將軍新軍萬戶佩金虎符宋安撫呂文煥守襄陽
攻之不下諭之不從最後遣人往招呂曰得張濟南一
言吾無盟矣公持詔往諭文煥遂舉城降十年授襄陽
等處統軍使總兵十七萬人十三年宋平公悉歸功諸
將以在軍旅歲久積勞成疾堅乞骸骨以歸與父言未
嘗及平宋事公生遼東鄂勒歡河又其二女為藩王妃
性樂其風土且便畜牧遂留居間歲一至濟南優游暇

豫以佚其老二十四年十一月初五日薨於濟南私第之正寢享年五十有九夫人某氏趙氏姜氏二子元節趙出元里姜出四女長雅蘓袞為諸王呼魯古爾妃次適姜從吉次為金剛努王妃次適洪澤屯田千戶梁紹祖諸王納新之叛連謀于呼魯古爾金剛努雅蘓袞以逆順禍福反覆開諭不聽故及於禍始逮赴詔獄有旨詰之曰若與納新搆亂亦嘗有人諭止若等否彼具以妃所陳對上嗟異曰是濟南張相子朕知其然矣命索

之軍中賜楮幣二千五百緡給傳歸濟南養疾有司供
億元貞初山東憲司以妃忠孝大節素著而供需不時
繼乞賜田以足廩餼事聞加賜二萬緡元節襲公爵宣
武將軍征西萬戶元里被吳王教建昌路達魯噶齊男
孫二阿海襲征西萬戶次某起嚴先世故濟南僚屬幼
及侍諸父暨聞中表老人語公家善政嘉績猶歷歷能
誦言流寓東平益都境其耆年叟亦論東諸侯為政尚
忠厚崇信義而不奪其力惟濟南為然餘弗及也至元

之罷侯守民蓋有視其故侯如路人甚至追咎怒罵如仇讐者公遷真定民傾城攀留西至郭門咸嗚咽俯伏羅拜至擁馬不得行曰我公不復惠我民矣公亦悲莫能仰視諭解久之方得出郊民望哭聲振原野又懷思遺愛為樹碑頌德祝其富壽及公被新軍萬戶之命過家覲濟南公民聞公之至郊迎者相望於外里巷室家悅喜於內是果何自而致哉良由濟南公性鍾仁恕動合天理推之以惠其民先公及公一遵其政故得民也

如此又聞青寇逼濟南濟南公怒曰國家何負李全而賊子敢爾昔吾壯盛時全猶不敢易吾賊子何為者耶惜吾身老兵戍宋境不時至致賊子得肆其逆吾惟以死捍賊終不鬪吾民也於是誓衆曰凡吾子孫卒屬有不一力討賊者吾有劒在衆聞其言勇自百倍了諭僚屬士民壁南山自保躬將輕騎駐將陵以拒璫故識者謂濟南公寧以身綴豕突之鋒而不忍死其民於矢石之下其忠仁勇為何如也故身備五福顯膺上爵善始

今終復有先公與公以濟其美天之報施理不誣也公
嗣子元節忠勤廉正鎮禦有方總戎遠征威惠兼濟嘗
為征西元帥府薦充副都元帥國家有大慶賚恩數與
諸王等元節偕其諸兄以公平昔事迹求為行狀故詳
錄其實不以謏聞附庶備宗工鉅儒之采擇云

元文類卷五十